

**Kalaallit Nunaanni nammineq piumassuseq naapertorlugu upalungaarsimasunik naalagaaffik suleqatigalugu pilersitsisoqarsinnaanera tamatumalu sunniutigisinnaasaasa misissorneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut**  
(Inatsisartuni ilaasortaq Doris Jakobsen, Siumut)

**Kalaallit Nunaanni nunami aammalu imaatigut kajumissutsimik tunngaveqartumik upalungaarsimasunik pilersitsisoqarsinnaaneranut periarfissanik soqutiginninnermullu misissuisoqarnissaa siunertaralugu Naalakkersuisut Naalagaaffimmut attaveqarnissaannut pisussaaffilerneqarnissaannut aalajangiinissamut siunnersuut**  
(Inatsisartuni ilaasortat Naaja H. Nathanielsen aamma Sara Olsvig, Inuit Ataqatigiit)

### **Akissuteqaat**

(Ineqarnermut, Pinngortitamut Avatangiisinullu Naalakkersuisoq)

### **Siullermeerneqarnera**

Naalakkersuisut naalagaaffik suleqatigalugu nammineq kajumissutsimik tunngaveqartumik nunami immamilu upalungaarsimasunik pilersitsisinnaanermut periarfissanik misissuissasut, Siumut sinnerlugu Inatsisartuni ilaasortaq Doris Jakobsen kiisalu Inuit Ataqatigiit sinnerlugit Inatsisartuni ilaasortat Naaja H. Nathanielsen aamma Sara Olsvig siunnersuuteqarput.

Naalakkersuisut isumaqarput, kajumissutsimik tunngaveqartumik upalungaarsimasunik aaqqissuussanik pilersitsinikkut inuiaqatigiit upalungaarsimanermi suliaasanut ilaatinneqarnerulernissaat isumassarsiatsialaasoq. Pingaartumik nunami pissutsit aammalu isumalluutit nunatsinni atorsinnaasatta killeqarnerat eqqarsaatigalugu tamanna inuiaqatigiinnut annertuumik iluanaarutaassaaq.

Københavns Universitetimi Sakkutooqarfeqarnermut Ilisimatusarfik 2012-imi decembarimi nalunaarusiamik suliaqarpoq, tassalu *Kalaallit Nunaanni inuiaqatigiinnut atuutsitsineq – Allannguutit, illersornissaq kajumissutsimillu tunngaveqarneq*. Nalunaarusiami ilaatigut inuiaqatigiit kalaallit nunani issittuni sakkutuut suliaasaasa isumagineqarnerinut akuutinneqarnerulersinnaanerit isumassarsiat aalajangersimasut nassuiarneqarput, ilanngullugu Kalaallit Nunaanni sakkutuutut ilinniartitaanerit atuutsinneqalernissaat. Nalunaarusiami ilaatigut danskit nammineq kajumissutsimik sakkutuutut suliaqartut nammineq kajumissutsiminnik suleqataajumasunik aaqqissuussisarnermik misilittagaannik ilaatsineq tunngavigineqarpoq. Aamma Kalaallit Nunaanni upalungaarsimanermik sillimaniarnermillu ulluinnarni suliaqartunit aamma inunnit isumalluutaasunit peqataaffigineqartumik, suliaqarluni ataatsimeeqatigiinnernit marlunnit, Københavni Nuummilu ingerlanneqartunit, isummersuutit nalunaarusiami ilaatinneqarput.

Inuiaqatigiinni kalaallini innuttaasut peqataatinneqarnissaanut periarfissat pitsaasuusut, kiisalu naalagaaffeqatigiinnermi aamma Namminersorlutik Oqartussani oqartussaasut akornanni suleqatigiinnerup oqaloqatigiinnerullu ingerlaqqinnissaanut tunngavissaqartoq inerniliissutaasut ilagaat.

Aamma Island qiviarneqarsinnaavoq, tassani nammineq kajumissutsimik upalungaarsimasunik ingerlalluartunik, innuttaasut ilarujussuinik peqataatitsiviusunik peqarmat. Tassani meeraanermiit nammineq kajumissutsimik upalungaarsimanermit pissutsinut ilinniartitsisoqalereertarpoq.

Island aamma Kalaallit Nunaat arlalitsigut imminnut assigiissuteqarput, soorlu nunami sumiiffinnut pissutsit, imaani inuussutissarsuteqarneq aammalu innuttaasut ikittut nukittuumik ataatsimoorfeqartut. Taamaattumik aamma Islandip qiviarneqarnissaa pissusissamisoorpoq.

Kajumissutsiminnik suleqataarusuttunik aqqissuussineq iluatsilluassappat, tunngavissat pisariaqartut arlaqarput. Ilaatigut kajussutsiminnik suleqataarusuttut aqqissuussaannermit sulisunik, atortunik ilinniartitaanernillu isumaginnittussami inissinneqartariaqarput. Kajumissutsiminnik suleqataarusuttut aalajangersimasumillu atorfeqartut akerleriittut isigineqassanngillat, kisiannili tulaavissatut illugiittut, pisuni assigiinningsuni suleqatigiissinnaasutut isigineqassallutik. Tamannaannarlu naammangilaq, tassami meeqqat mikineriniit aamma nammineq kajumissutsimik upalungaarsimanermit pissutsinut aamma peqataatinneqassapput.

Misissugassatut siunnersuutigineqartut misissornissaannut Naalakkersuisut piareersimapput, kisiannili siunnersuutip Inatsisartuni inaarutaasumik aalajangiifigineqannginnerani ataatsimiititaliamut suliaassanngorlugu nassiunneqarnissaa inassutigalugu.